

Eibenstock

Unner Hutznobnd mit drei „Blinde Hühner“



Schu vor längerer Zeit wollt iech die Maad emol ze uns eilodn, aber des hat terminlich immer net geklappt. Aamol gings bei uns net un is annere mol hattn die dreie Urlaub, des muss ja aa emol sei. Itze hatts nu endlich ganz kurzfristig bei alln gepasst.

Iech kenn die Maad ja schu lang un die ham miech aa gelei an dor Stimm wiederdorkannt. Mir sei uns nämlich des öftern dozemol im Kulturhaus in Aue begegnt, do hattn mir mitenanner ze tu, wenn dor Blinden- un Sehschwachenverband bei uns öfters ihre Vorsammlinge hattn. Do hab iech aber net gewußt, des die aa esu gut singe kenne! Erscht bein 60-gähring Jubiläum vun Erzgebirgsangsambl sei die mir die besonnersch aufgefalln, un do war mir gelei klar: Die Maad sölln unbedingt bei uns in Eimstock auftratn! Nu wars an 5. September endlich su weit.

Bei dor Begrießung wollt mir des gar net ieber de Lippn gieh. Un doch mußst iech se aakindign: „Die Blinden Hühner“! Vorsichtshalber hob iech gelei noch emol noochgefreescht, öb des net ebberemende e Schimpfwort for se is, aber alle drei Maad, de Heike, de Birgit un de Gabi, ham bestächt, des se siech den Name salberscht ausgesucht ham. Denn: alle dreie sei stark sehbehindert bzw. blind. Seit ettlichn Gahrn schu tratn die zu allemöchlichn Aalässn mit ihrn schenn 3-stimmign A-Capella-Gesang auf un singe aafach allis, wos lustich is: vu erzgebirgschn Liedern un Gedichtle, ieber huchdeutsche Volksliedle, Oldies, Schlager bis hie aa zen klassischn Liedgut.

Sugar vor de Bietls ham se net Halt gemacht: „Yesterday“ un „Let is be“ (of gebirgisch iebersetzt „Gestn noch“ un „Less is gieh“) muss mor aafach gehert ham vu den Maadn un ihrn Kerl! Ach su, dar Kerl, dor Winfried, des is suzesogn dene ihr Dschoker, dar is allis: Schoffeer, Techniker, Aasoocher un singt aa salberscht noch mit.

Die ham allezam machtign Spaß bei ihrn Auftrittn un heizn ihre Besucher su richtig aa, do bleibt kaa Aach trockn, des kenne mir eich alle bestäign. Is is schu wie e Wunner un aadorkenninswart, des sich die dreie mit ihrer argn Behinnerung an suwos naagetraut ham un dann aa noch imhaarfahrn un alln Leitn ze ihrn Fastern sölche Freid bringe!

Itze hätt iechs beinah vorgassn: Die ham sugar ne CD mit ihrn Leidern besunge, die kaa mor siech bei däne ieber ihre eichne Seit im Innet

www.die-blinden-huener.de – bestelln!

For uns war des e wunnerschiener Hutznobnd un mir ham uns vürgenomme, se ganz bestimmt wieder mol eizelodn.

Is Postplatzfast anno 2024

Hut ab for den Aufwand un de Organsatschjon! Unner Eimstocker Gewarb- un Tourismusvoren hat siech mächtig dodorfier ins Zeich geleecht.

Un allezam ham mitgemacht un zamgegriffn, des die vieln aanzlnen Ständle samt



dar zwee Bühne aufgebaut un mit Laabn dorfüllt wurn sei! Un mir durftn aa wieder mit dorbei sei. Do ham mir halt unner Wurzlrudis geschnappt un aufnern Tisch schie zen aaguckn plaziert, aa unner Bühle warn an dor Seit mit dorbei. Gleidornabn saßn ab Mittoch zwee Bastler un ham gezeichnet, wie su e Mannl zamgericht werd. Dodormit aber net genuch: Mir ham aa noch de Schnitzer dorzu eilodn, die kenntn

siech aa eweng präsentiern, zemol ja unner Lothar do dorbei is. E paar Kinner ham do gelei mol probiert, wie mor mit nern Masser imgieh muss un konntn dann in klenn Schwamm mit eham namme. Dorweil hat draußn dor Thomas Helm in Wurzl-Rudi of de Stroß gemolt un de Klenn durftn den ausmoln.

Drinne im Saal hat siech unner Eimstocker Gewarb gezeichnet. Sugar de Schirzn aus altn Zeitn warn dorbei.

E besonnerer Hiegucker warn de Urne samt in Sarch, halt dorweil schu mol zen Aussuchn gedacht, aa des gehärt ze uns Menschn, denn unner Labn is nu mol endlich!

Gleidornabn warn wunnerbare Ruhebänk – net grad billich - aber bestimmt for viele Gahr im Gartn gedacht. Ja, unner Filzlaatschn durftn aa net faaln – die gehern aafach an unner Eimstocker-Fieß!

De Allianz hat bestimmt allis gut vorsichert un bein Reiter-Funke durftn de Kinner wie de Pfarle ieber die Oxer – oder wie die Dinger haaßn – springe – aafach lustich un racht schie for de Klenn! Allis in alln – e super gelungnis Doreichnis for Eimstock!

Aufgeschriebn hat des dor Schmidt von Haamitvoren